

## Wasilisha Kitu Bora

*Akamtaazama Yesu akitembea, akasema, Tazama, Mwana-kondoo wa Mungu!—Yohana 1:36.*

**K**uwafikia watu, pale walipo na bila kujali nafasi au hali zao na kuwasaidia katika kila njia iwezekanayo—hii ndiyo huduma ya kweli. Kwa juhudi ya namna hiyo unaweza kuigusa mioyo ya watu na kufungua mlango wa njia ya kuzifikia roho zinazoangamia.

Katika kazi yako yote kumbuka kwamba umeunganishwa pamoja na Yesu, sehemu ya mpango mkuu wa ukombozi. Upendo wa Yesu katika kuponya, mkondo ule tao uzima lazima utiririke kupitia maisha yako. Unapotafuta kuwavuta wengine wanaoweza kufikiwa na upendo Wake, ruhusu usafi wa maneno yako, manufaa ya huduma yako, uzuri wa mwenendo wako, vitoe ushahidi wa uweza wa neema Yake. Mwakilishe Yesu kwa ulimwengu kwa usafi na kwa haki, ili watu waweze kumwona katika uzuri Wake.

Haisaidii sana kujaribu kuwabadilisha wengine kwa kushambulia kile tunachoweza kukichukulia kuwa mazoea mabaya. Juhudi hizo mara nyingi huishia katika kudhuru zaidi kuliko kusaidia. Katika mazungumzo Yake na mwanamke Msamaria, badala ya kukisema vibaya kisima cha Yakobo, Yesu aliwasilisha jambo jema zaidi. Alisema, “Kama ungalijua karama ya Mungu, naye ni nani akuambiaye, Nipe maji ninywe, ungalimwomba yeye, naye angalikupa maji yaliyo hai” (Yohana 4:10). Aliyaelekeza mazungumzo kwenye hazina aliyotaka kuitoa, akimpatia mwanamke kitu bora zaidi kuliko alichokuwa nacho, yaani maji ya uzima, furaha na tumaini la injili.

Hiki ni kielelezo cha namna ambavyo tunapaswa kufanya kazi. Lazima tuwapatie watu kitu kilicho bora zaidi ya kile walichonacho, yaani amani ya Yesu, ipitayo ufahamu wote. Lazima tuwaambie juu ya sheria takatifu ya Mungu, nakala ya tabia Yake na onesho la vile ambavyo Anatamani wawe. Waoneshe jinsi utukufu wa mbinguni usioharibika ulivyo mkuu kuliko furaha na anasa za kitambo. Waambie juu ya uhuru na pumziko lipatikanalo katika Mwokozi. “Ye yote atakayekunywa maji yale nitakayompa mimi hataona kiu milele,” Alitangaza.

Mwinue Yesu juu, ukitangaza, “Tazama Mwana-Kondoo wa Mungu aichukuaye dhambi ya ulimwengu!” (Yohana 1:29). Yeye peke Yake anaweza kutosheleza shauku kuu ya moyo na kuipatia nafsi amani.

Miongoni mwa watu wote ulimwenguni, wanamatengenezo wanapaswa kuwa watu waliouhinda ubinafsi, wema zaidi na wenye staha zaidi. Katika maisha yao kunapaswa kuonekana wema wa kweli wa matendo yasiyo na ubinafsi....

Wanafunzi wa Yesu wanapaswa kuonesha roho ambayo inatawala mbinguni.... Watendakazi wanyenyekevu, katika kushirikiana na Kristo, wanaweza kugusa kodi ambazo mvumo wake utasikika mpaka mwisho wa dunia na kutoa wimbo mzuri katika zama zote za umilele (**The Ministry of Healing, 156-159**).